



Synfocity = 382

22nd March, 2012

mail us at : mzsynfo@gmail.com; mizoramsynod@gmail.com - Phone - 2314648

1 Central KTP hruaitute charge inhlan

March 15 khan Central KTP Hruaitu hlui leh tharten Synod Committee Room No. 1-ah mawhphurhna inhlan felin Hruaitu tharte thutkhawmna hmasa ber neih zui nghal a ni.

Rev. K. Lalpiangtharan Leader thar Rev. Lalrinmawia hnenah CKTP Leader mawhphurhna a hlan a, Office Bearers dangten an hlan zui ve nghal bawk. General Secretary Upa Lalrinmuana erawhchu ruat nawn a nih avangin charge inhlan a ni lo.

Charge inhlan fel hma hian Central KTP hruaitu kalchhuak leh a tharte chuan March 1 - 4, 2012 chhunga KTP General Conference vawi 54-na, Thenzawla neih zawh tak chu an thlirlet a. Conference tluang taka hman a ni a, kum dang zawng aiin palai kal pawh an thahnem a, palai 23123 lai in ziak lut awmin lehlanga kal engemaw zat an awm bawk. Thenzawl khaw mipuite inpekna leh inbuatsaihna fakawm an ti hle a, sum leh pai, tha leh zung tam tak an seng tih a lang a, heng zawng zawng hi a let tam takin Pathianin malsawmin a vur let ngei ang tih ringin duhsakna an hlan bawk. CKTP hruaitute hian zanriah an kil ho nghal a, hemi zawh hian Hruaitu tharten thu pawimawh zual an ngaihtuah zui nghal a, Conference rorel bawhzui dan tur te, Leadership Training neihpui tura an sawmna te, Synod Choir an sawmna leh thil tul dang eng emaw zat an rel a, thurel zingah KTP General Conference thlengtu tur indawt, kum rei zawk atana ruat lawk a nih theih nan kum 2016-a KTP General Conference thleng duh tan dil theih a ni a, kum 2013 KTP Rorel Inkhawma puan theih turin dil theih a ni ang. Ram pum huap tawngtai neih rawtna te, Mental Health inzirtirna neih chungchang te, Work Ethics neih chungchang te, Value System (ngaihhlut tur dik) inzirtir chungchang te, Krismas Hla bu thar changtlung zawk siam chungchang te, kumpuan thupui chungchang te chu Sub-Committee insiamin an hmalaknate Committee lehah ngaihtuah a ni ang. Youth Recreation Centre pualin member tinin Rs. 5/- theuh thawh tura tih chu October, 2012 ral hmain Central KTP Office-ah Bial kaltlangin thelulh tura rel a ni bawk.

1 SMTC-in Computer zirzo thlah

Synod Multipurpose Training Centre (SMTC) chuan March 16 khan Certificate in Computer Application Course batch 9-na zir chhuakte thlahna inkhawm an hmang a, Upa C. Ngurthanmawia, Synod Statistician chu Khuallian a ni.

SMTC Programme Director Rev. F. Lalrinnungan inkhawm kaihruiain SMTC Office Assistant Upa Vanlalhuman report a pe a, Khuallian Upa C. Ngurthanmawian zir chhuakte hnenah Certificates leh lawmman semin thu sawina hun a hmang a. Zir chhuakte aiawhin Lalhruaizela Colney-in thusawina hun a hmang a, Tv. Andrew Laltlankima a zai bawk. Mission Vengthlang Bialtu Pastor Lalbiakvulmawian malsawmna sawiin hun a khar a ni.

SMTC Computer zirna hi Council for World Mission (CWM) Mission Programme Support Fund atanga kalpui a ni a. October 15, 2007 khan Computer zirna hi hawn tan a ni a, course khat zir hun chhung hi thla 6 chhung zel a ni. Zirna atan hian Registration Fee Rs. 100/- leh monthly fee Rs. 50/- lak a ni a. Tluang taka zir chhuakte hnenah Incentive Prize Rs. 1,200/- zel pek thin a ni bawk.

Tun tuma SMTC Computer course batch 9-na zirchhuakte hi mi 20 an ni a, zir chhuak thei ta lo mi 10 an awm bawk. Computer Course zirna hawn a nih atangin mi 181-in an zir chhuak tawh a ni.

1 Lehkhabu tlangzarh

March 20 khan Synod Office Committee Room No.1-ah "Israel-te Riahmun" tih lehkhabu, Upa Dr. Vansanglura, Chhinga Veng ziah chu Rev. Zosangliana Colney, Executive Secretary i/c. MSSU, Mizoram Synod chuan a tlangzarh. Lehkhabu tlangzarh inkhawmah hian mi sawm bik engemaw zat an kal a, Pastor K. Lalthangmawia, Chhinga Veng Bial vawngtuin hun a kaihrui a. Lehkhabu tlangzarh a nih hma hian a ziaktu Upa Dr. Vansanglura hian lehkhabu ziak a nih dan leh a inbuatsaihna te, lehkhabu thu fun tlangpui te sawiin hun a hmang a. Rev. Zosangliana Colney-in lehkhabu tlangzarh tur sawi hawn lawkna hun hmangin a tlangzarh nghal a ni.

Upa Dr. Vansanglura hian Columbia University, New York-a a zir laia lehkhabu tha rawntlak, hmuh mai mai harsa em emte chhiarna hun remchang a neih theih avanga a hna a awlsam phah thu te, Juda scholar ropui tak takte nena hmaichhana titiho theihna remchang a neih thu te sawiin he lehkhabu bakah hian Israelte riahmun hi a map pawh a siam theih tak thu a sawi a. He Riahmun Map hi Mizo Sunday School Union property atan a hlan nghal bawk a, Rev. Zosangliana Colney-in a dawng a ni.

Lehkhabu tlangzarhtu Rev. Zosangliana Colney chuan Mizo Kristian-te nuna Bible ram chanchin pawimawhzia te, chanchin rei tawh a nih avanga chhui fiah a harsatzia te sawiin hetiang lehkhabu rintlak tak mai ziaa a lo awm ta chu lawmawm a tih thu a sawi a. Kum 2012 chhunga Presbyterian Kohhranin Numbers bu a zir mek leh Mizoram Baptist Kohhran-in Exodus bu a zir mek tana tangkai kawp thei tur lehkhabu pawimawh a hun taka ziak zawh a ni chu lawmawm a tih thu a sawi bawk. Rev. Zosangliana Colney chuan he lehkhabu ziaktu hi thiamna lamah leh Pathian thu hriatna kawngah pawh teh tawna he lehkhabu ziak awm ber zinga mi ni a a ngaih thu a sawi.

Israel-te Riahmun tih lehkhabu hi lehkhabu dawr hrang hrangah lei theiha dah nghal tur a ni a, a man hi Rs.100/- a ni. Numbers leh Exodus bu zirtute tan tanpuitu lehkhabu tangkai tak a ni dawn a ni.

1 Zin

w March 22 - 26 chhung hian Biateram Synod Inkhawmpui, Fiangpui, Haflong-a neih turah Mizoram Synod aiawha palai turin Rev. Vanlalzuata, Senior Executive Secretary leh Upa Lalbiakliana, Kolasib Electric Veng te an kal. Hemi chhung vek hian Cachar Hill Tribe (CHT) Synod Inkhawmpui, Haflong-ah Rev. Zosangliana Colney, Executive Secretary, Upa C. Tawnkima, Thingsul Tlangnuam leh T/Upa J.K. Lalengzauva, Synod Office-te an kal bawk.

w March 13 & 14 khan Presbyterian English School Principal leh Zirtirtuten Continuous and Comprehensive Evaluation (CCE) Training, SCERT-ah an nei. Hetah hian Principal leh Zirtirtu 75 lai an tel thei a, training hlawhtling tak an hmang ho a ni. Training neih zawh tuk (March 15) khan Synod Committee Room-ah Inpawlhona neih zui a ni a, an kal zelnat tur atana thu pawimawh tak takte an sawiho a ni.

w March 23 - 25 chhung hian Champhai Vengthlang Kohhranah Account Training leh Finance Campaign neih a ni dawn a, hemi neihpui tur hian Upa C. Lalmuankima, Asst. Finance Manager, Upa Vanlalngaia leh NI. Carolin Biakthansangi te an kal ang.

1 Synod Multipurpose Training Centre

Synod Multipurpose Training Centre (SMTC) buatsaihin Kohhran Upate puala Lay Leaders' Training vawi 167-na chu zanin (March 22) hian a kharna inkhawm neih a ni dawn a, Rev. Dr. Lalhmangaiha, Synod Finance Officer chu Khuallian a ni ang.

Contd...

Tun tum Lay Leaders' Training-ah hian Lunglei West Presbytery leh Vaivakawn Bial atangin Upa 16 an tel thei a ni. Synod Multipurpose Training Centre hian Vocational Training hrang hrang – Puanthui, Pheikhawk Siam, Laphiar leh Computer zirna te a buatsaih thin a ni.

1 **CSI Retreat Aizawl-ah**

Church of South India Bishop 15 leh an nupuite bakah CSI Synod official dang paruk, an zavaiin mi 36 te chuan Aizawl-a Retreat neih an duh thu leh, anmahni lo thleng tura Mizoram Synod an ngenna an rawn thlen angin Mizoram Synod chuan a thleng dawn a, a senso chu CSI hian an rawn intodelh vek dawn a ni. Retreat hi March 26 - 27 hian neih tur a ni a, March 24 (Inrinni) hian Aizawl an lo thleng ang.

March 25 (Pathianni) Aizawl khawpui chhung Kohhran hrang hrangah insemdarhin Sunday School leh Zan Inkhawm an chhim ang. March 27 (Thawhlehi) ah Mizoram Synod chuan Moderator's Dinner a buatsaihsak ang a, hemi hun hi Cultural Evening programme a ni nghal ang a, hnam lam chi hrang hrangte entir turin Chaltlang Lily Veng Cultural Club sawm an ni a. Mizoram Synod Choir an zai bawk ang. Hemi hunah hian Mizoram Synod chuan CSI hotu lo kalte hnenah hian ngaihruina thilpek a hlan bawk ang. CSI puipate hian March 28 (Nilaini) ah hmun pawimawh tlawh kualin programme an hmang ang a, March 29 (Ningani) ah Aizawl an chhuahsan leh ang.

He Retreat lo thlen dan tur leh mikhualte lo enkawl chungchanga mawhpur turin Synod chuan Committee a siam a, he Committee hian ruahmanna a siam fel tawh a. Synod hminga thlengtu chan chang turin Chaltlang Kohhran a ruat a. Chaltlang Kohhran Hall-ah Retreat hi neih a ni ang. Mizorama an awm chunggingin Mizo hnam ziarang hmuh theihna tur hmun pawimawh leh Kohhran hmun pawimawhte tlawh an duh avangin an tlawh tur hmunte hi Committee chuan a ruahmansak fel tawh bawk.

1 **Pro. Pastor Orientation**

March 26 - 31 chhung hian Mizoram Synod hnuaiia Pro. Pastor te puala Orientation training, Synod Conference Centre, Mission Vengah neih a ni dawn a, training-ah hian an rawngbawlna kawnga tangkai tur thil chi hrang hrang hetiang hian zirtir an ni ang : **Church Administration** – Rev. C. Vanlalhrauia, **Issue in Worship** – Revd. Chuauthuama, **Biblical Hermeneutics** – Rev. Dr. Lalhmangaiha, **Issue in Pastoral Care & Counselling** – Rev. C. Sangliana, **Mission Issue** – Upa R. Lalmalsawma, **Synod Rules & Regulations** – Rev. H. Remthanga, **File vawn leh Office Dawr** – Upa F. Lalremthanga, **HIV/AIDS Issue** – Dr. Robert S. Halliday, **Departments of Synod Committee** – Rev. Zosangliana Colney, **Information/Public/Interpersonal Relations** – Rev. C. Lalhira, **Health Education** – Dr. C. Lalhrekima, **Articles of Presbyterian Faith** – Rev. Dr. Lalchhuanliana, **Life Style of a Pastor** – Rev. K. Lungmuana, **Current Social Issue** – Rev. Dr. R. Lalbiakmawia, **Zirtirna dik & dik lo** – Rev. Vanlalzuata, **Revival Issue & Pastoralia** – Rev. H. Lalrinmawia, **Pension & Service Rules** – Upa D.P. Biakkhuma, **Pastor & Materialism** – Rev. Lalzuithanga, **Mipuiin Pastor an beisei dan** – Upa C. Ngurthanmawia

1 **Synod Mission Board**

March 26 - April 4 chhung hian chhung hian Field Committee hrang hranga tel turin Rev. Lalchhuanmawia, SMB Secretary, Rev. Z.D. Lalhmachhuana leh Upa B. Lalrinliana te an kal ang. March 28 (Nilaini) hian Arunachal East Field Committee, Khasan-ah an thu ang a, March 30 (Zirtawpni) hian Arunachal West Field Committee, Itanagar-ah an thu leh ang a, April 2 (Thawhtanni) hian Assam Field Committee, Guwahati-ah an thu leh ang.

1 **Kristian Thalai Pawl**

w March 24 (Inrinni) zan hian Saron Veng Branch KTP ten Leadership Training an nei dawn a, training neihpui tur hian Upa Lalrinmuana, CKTP General Secretary leh Pu Lalmuanpuia Hrahse, CKTP Committee Member-te an kal ang. March 24 zan vek hian Tanhril Bial KTP huapin Tuivamitah Leadership Training neih a ni dawn a, training hi T/Upa Lalramdina Ralte leh Tv. R. Lalramnghaka, CKTP Committee Members ten an neihpui ang.

March 17 khan Rev. Zosangliana Colney, Executive Secretary-in Samlukhai Kohhran Biak In thar a hawng a, Synod Choir-te an zai bawk. March 19 zan khan Synod Choir-ten Saron Veng KTP-te tlawhin hun an hmang bawk.

w Synod Choir leh Central KTP hruiute rawngbawlna nei tura sawm duhte chuan a theih anga hmian sawmna thehluh thin tur a ni a, Synod Choir/CKTP hruiute hun hmanna hnaivai deuh chuan Branch dang kian thiam turin Central Committee chuan Branch tinte a ngen a ni.

1 **Family Guidance & Counselling Centre**

March 23 - 25 hian Phulbial Kohhran, Phuldungseiah Kristian Chhukungkaw Campaign & Seminar neih a ni dawn a, hemi neihpui tur hian Rev. C. Chawngliana, FG&CC Counsellor, Upa Chalzika, Committee Member leh Pi Khawlvuani, Committee Member te an kal ang.

1 **MSSU**

March 23 - 25 hian Kawlkuh Hmar Veng leh Hnahlan Kohhranah Sunday School Zirtirtu Training neih a ni dawn a, training neihpui tur hian Kawlkuh Hmar Veng Kohhranah Upa K. Zoremsanga, Kulikawn leh Upa K. Vanlalngghaka, Ramhlun East (MSSU Trainers) te an kal ang a, Hnahlan Kohhranah Pu Lalthahluna Ralte, MSSU Asst. Coordinator leh Rev. V.L. Krawschuanmawia, Synod Office te an kal ang. Inrinni zan inkhawm atangin Fanau enkawl chungchang thuchah an sawi bawk ang.

1 **Hruaina Eng FM Radio & TV Programme**

w **MARCH 23 (FM Radio @ 7:30 p.m.) : Choir** : Besy Choir - Ebenezer; East Phaileng Pastor Bial Zaipawl - Sualin Ka Lo Thi Ta; **Thuchah** : Tual Upa Lallianmawia - Krista Chanchin tha puandarh; **Choir** : Kolasib Hmar Veng Pastor Bial Zaipawl - Van Ram Mawi; **Solo** : Nancy Zothnmawii - Min hre reng ang che

w **MARCH 25 (TV Programme @ 3:00 p.m. : Sermon** : Rev. V.L. Krawschuanmawia - Ka khawngaihna i tan a tawk, **Drama** : Romama

1 **Susamachar Prasaran Programme**

March 25 (Pathianni) tlaiah Hindi Programme (Susamachar Prasaran) LPS & Zonet Cable atangin hetiang hian tih chhuah a ni ang : **Group/Choir/Solo** : Govt Complex Kohhran - Syon Desh; **Group/Choir/Solo** : Champhai Vengthlang Pastor Bial - Hamara Kal; **Sermon** : Zohmingthanga - Prabhu Yesu Hamare Vishram Sthal; **Group/Choir/Solo** : Dawrpui Vengthar Pastor Bial - Yesu Masih; **Group/Choir/Solo** : Bungkawn Masihi Sangati - Ji Uthe

1 **Moderator Programme**

Synod Moderator Rev. Thangzauva chuan tunkar tawpah hetiang hian hun a hmang ang :

w March 23 (Zirtawpni) - Centenary hmanpui, Neihdawn Kohhran

w March 25 (Pathianni) - Rawngbawltu inhlun thar programme, Luangmual Vengthlang Kohhran

w March 29 (Ningani) - Centenary hmanpui, Serchhip Vengchung Kohhran